

Agama Islam paling disalahertikan — PM

UM - 1 JUL 2000

Oleh SITI HANIZA
ABDUL RAHMAN
dan MOHD. RAMESH

KUALA LUMPUR 30 Jun — Perdana Menteri, Datuk Seri Dr. Mahathir Mohamad berkata, Islam adalah agama yang paling disalahertikan berbanding agama-agama lain di dunia dan seringkali digambarkan sebagai agama yang menyokong kepada keganasan.

Tegas beliau, kemelut itu timbul akibat konflik dan konfrontasi yang berterusan di antara masyarakat Islam dan bukan Islam serta sesama umat Islam.

Menurutnya, keganasan wujud dalam semua agama sama ada Kristian, Hindu, Buddha dan Islam serta kumpulan-kumpulan kecil dalam setiap agama itu.

Jelas beliau, keganasan yang membabitkan masyarakat Islam sering dikaitkan dengan agama Islam tetapi keganasan yang dilakukan oleh masyarakat bukan Islam la-

ngsung tidak dikaitkan dengan agama mereka.

"Aum Shinrikyo, penganut Buddha yang telah melepaskan gas beracun di Jepun tidak dipanggil penganas Buddha, begitu juga dengan penganut Katolik dan Protestan yang bertelagah di Ireland Utara tidak dilabelkan penganas Kristian.

Diskriminasi

"Tetapi sekiranya, orang Islam yang menyimpang dari ajarannya menyerang orang bukan Islam mereka akan dilabelkan sebagai penganas Islam, mengapa berlakunya diskriminasi terhadap Islam oleh media," katanya.

Beliau berkata demikian ketika menyampaikan ucapan utama pada majlis perasmian Seminar dan Dialog Antarabangsa bertemakan Mengukuhkan Pemahaman Terhadap Islam untuk Media di Institut Kefahaman Islam (IKIM) di sini hari ini.

Perdana Menteri mem-

beri contoh terhadap keganasan yang menimpa masyarakat Islam di Bosnia Herzegovina, Kosova, Chechnya dan beberapa negara Islam yang ditindas dengan kejam.

Jelas beliau, pembunuhan beramai-ramai, genangkan dan penderaan di Srebrenica (Bosnia Herzegovina) seawajarnya diberi pendedahan tetapi tidak ada satupun yang membicarakan tentang kesengsaraan masyarakat Islam yang diusir dari tanah air mereka.

Pertahan diri

"Kesalahan mereka hanyalah disebabkan golongan tersebut beragama Islam. Memang mereka melawan penindasan tersebut dengan alasan mempertahankan diri dan kadangkala melakukan keganasan serta membunuh.

"Tetapi bukan mereka sahaja melakukan perkara tersebut atas dasar marah dan kecewa," katanya.

Beliau turut mempersoalkan mengapa cerita sebenar yang menyebabkan masyarakat Islam bertindak sedemikian tidak didedahkan dan tidak terlepas dari menerima kutukan.

Menurutnya, apakah sebab cerita bagaimana golongan tersebut ditindas, didera dan dibunuh dengan kejam oleh musuh mereka tidak dipaparkan.

Dilindungi

Dalam pada itu, dalam ucapannya, Dr. Mahathir berkata, Islam bersedia untuk membetulkan imej yang serong terutamanya berkaitan dengan keganasan tetapi memerlukan bantuan media khususnya media Barat.

Katanya, masyarakat Islam yang ditindas, didera itu seharusnya diberikan simpati dan dilindungi malangnya mereka dituduh melakukan keganasan dan patut menerima suratan takdir akibat tindakan mereka itu.